

元史新編

元史卷六

本紀四下

世祖下

至元十六年己卯春正月甲寅移贛州省治還龍興辛酉
宋合州安撫王立降詔殺立旣而赦之召入覲仍其故官
自是東川州縣皆下壬戌分川蜀爲四道以成都等路爲
川西道廣元等路爲川北道重慶等路爲川南道順慶等
路爲川東道竝立宣慰司甲戌張弘範李恆兵至厓山張
世傑走宋主昀及其官屬俱蹈海死宋亡前後得戶一千
一百八十四萬八百有六二月戊寅朔升溧州爲路遣使
訪通皇極數都陽祝泌子孫獲其書以獻癸未增置前後
二衛都指揮司共爲五衛建司天臺於大都製銅儀象圭
表又於上都洛陽等五處分置儀表各設監候官癸卯敕

大都河間山東鹽運司並兼酒醋商稅甲辰發嘉定新軍屯田脫里北之地命嘉定新附州郡及田楊二家諸貴官子俱充質子入侍乙巳立西蜀四川道提刑按察司志作十九年詔河南西京北京各路課程聽宣慰司兼領圖太祖太宗睿宗御容於翰林院命院官春秋致祭三月戊申朔詔大兵渡江以來農民不無騷動今已安集務宜敦本力田各正官以時勸課如無成效者糾察遣郭守敬由上都大都歷河南府抵南海測驗晷景丙寅敕中書省凡掾史文移稽緩一二日者杖三日者死甲戌授八番龍文求爲臥龍番龍延三爲大龍番龍方零爲小龍番俱安撫使得洞寨一千六百二十六命太常寺定州郡祭祀儀式及壇壝祭器圖寫成書名至元州縣社稷通禮夏四月癸巳命給

事中兼起居注掌隨朝諸奏事復立江西樵茶運司及諸

路轉運鹽司宣課提舉司

以兩淮鹽引五萬道召商中糧

癸卯填星犯鍵

閉乙巳選南軍二萬人增宿衛五月丙辰置漣水海州等

處總管府募民屯田丙寅敕僧司文移毋輒入遞丁卯升

雲南寶山蒨蕖二縣爲州癸酉行省言賦北京西京車牛

皆至可運軍糧帝曰民之艱苦汝等不問但知役民使今

年盡取則來歲田禾何由得種其止之六月丁丑朔發新

附軍戍碣門魚通黎雅甲申宋張世傑溺死海陵部將百

五十八人詣瓊雷二州降癸巳雲南都元帥愛魯將兵分

定亦奚不薛抵金齒蒲驃曲臘緬國界招降忙木巨木禿

等三百寨師還獻馴象十二

亦奚不薛者羅施鬼國別部也亦曰亦乞不薛

令京

朝諸官雇役開浚通州河癸卯以阿合馬子忽辛爲潭州

行省左丞從子別都魯丁爲河南宣慰使秋七月戊申置東宮侍衛軍定江南上中路置達魯花赤二員下路一員應昌府如例設官己未改朵哥麻思地之算木多城爲鎮西府丙寅填星犯鍵閉癸酉遣中丞崔或訪求江南藝術之人八月庚辰太陰犯房距星戊子海賊賀文達降括所掠婦女還之民庚寅敕沅州總管乞荅合征取桐木籠狝狝伯洞諸蠻海賊金通精死獲其從子溫有司論如法帝曰通精已死溫何預焉特赦其罪詔每歲聖誕元辰禮儀費用名爲己俸無非科斂民財應一切停止丁酉以江南所獲碧玉爵及玷凡四十九事納於太廟庚子歲星犯軒轅大星甲辰定漢軍出征逃者死且沒其家女眞水達達軍不出征者隸民籍輸賦九月庚戌以忽辛兼領杭州諸

色人匠歲造繒段十萬匹置大護國仁王寺總管府建聖
壽萬安寺於京城己巳統軍唐兀帶麻陽達魯花赤武伯
不花劫掠辰沅新附民千餘口詔卽軍中斬之冬十月乙
酉帝御香閣命大樂署令完顏椿等肄文武樂丙申太陰
犯太微西垣上將十一月丙午詔皇太子燕王參決朝政
凡事先啟後聞戊申敕諸路所捕盜初犯贓多者死再犯
贓少者從輕論罪有盜以舊鈔易官庫新鈔百四十錠者
有司謂罪不應死帝以其父執役巨家卽論如法癸丑太
陰犯熒惑己巳并教坊入拱衛司十二月甲申祀太陽丁
酉八里灰貢海青回回等所過供食羊非自殺者不食百
姓苦之帝曰彼吾奴也飲食敢不隨我朝乎禁勿與降歸
州路爲州升沔陽安陸各爲府濟寧安西慶遠建寧漳惠

梧柳象邕賓橫容潯諸府州並爲路

十七年庚辰春正月丙辰定遷轉官員法凡無過者授見
闕物故及過犯者選人補之滿代者令還家以俟又定諸
路差稅新增者卽上報隱漏者加罪不必履畝清丈動搖
百姓戊辰放荆南江廣所俘男婦三萬二千餘人爲民置

福建行省於福州尋移泉州改德慶路爲總管府二月乙

亥命和禮霍孫將兵與高和尚同赴北邊

時有言高和尚善秘術能役鬼

爲兵故有是役

三月乙卯立都功德使司掌帝師所統僧徒并吐

蕃軍民事賜國師掌教所印辛未立畏吾境內交鈔提舉
司柳林營田提舉司給月脫古思八部屯田牛具陝西轉
運使郭琮等殺安西王相趙炳詔逮琮等誅之夏四月壬
申朔升宣德龍門鎮爲宣德縣隆興楊門站爲懷安縣丁

亥立杭州金玉總管府庚子歲星犯軒轅大星山東諸郡
霜真定路蟲皆損桑五月甲辰作行宮於察罕海子之北
丙午升沙州爲路并括戶丁以富戶餘田分戍軍耕種六
月辛未朔新厯成詔曰自古有國牧民之君必以欽天授
時爲立治之本黃帝堯舜以至三代莫不皆然爲斯官者
皆世守其業隨時攷驗以與天合故厯法無數更之敝及
秦滅先聖之術每置閏於歲終古法益殫廢矣由兩漢而
下立積年日法爲推步之準因仍沿襲以迄於今天運
流行不息而欲以一定之法拘之未有一久而不差之理差
而必改其勢有不得不然者前命太史院作靈臺制儀象
日測月驗以攷其度數之真積年日法皆所不取庶幾脗
合天運而永終無敝比日新厯告成賜名授時厯頒行天

下布告遐邇咸使聞知壬申安西王薨罷王相府壬辰頒鈔法於江淮廢宋舊錢并括銅器戊戌阿合馬矯殺江淮平章阿里伯右丞燕帖木爾崔斌等秋七月戊申太陰掩房距星己酉太陰犯南斗徙泉州行省治龍興戊午阿合馬薦郝禎耿仁竝爲中書左丞用姚演言開膠東河屯田漣海乙丑罷江南財賦總管府并大都鹽運司入河間割建康民二萬戶種秫歲輸釀米三萬石己巳遣中使歷江南名山訪求高士且命持香帛詣信州龍虎山臨江閣阜山建康三茅山設醮八月庚午朔改蒙古侍衛總管爲蒙古侍衛親軍都指揮使丙子太陰犯心東星丁丑梭都請招三佛齊等國不允是月許衡致仕姚樞卒九月甲子太陰犯右執法并犯歲星丁卯羅施鬼國主阿察阿里降召

入覲冬十月丁丑遣湖南兵萬人伐亦奚不薛降其民亦
奚不薛稱疾遣從子入朝帝曰彼不稟命輒以職授從子
無人臣禮宜令亦奚不薛出始罷兵壬午立陝西四川行
中書省己丑以都實爲招討使往西域窮河源丙申定在
官者任事一月始給俸初置象輦以備巡幸十一月己亥
朔置泉府司掌御用及太后太子諸王出納事戊申敕疏
通鈔法凡賞賚多給幣課稅多收鈔是月廉希憲卒十二
月戊寅加奉使木剌由國速刺蠻爲招討使壬辰福建陳
桂龍及其兄子陳弔眼據漳州反元帥完者都擊之走入
甬洞甲午重建太廟成奉遷神主於祐室迎太祖睿宗二
金主入新廟行大享禮置領北庭都護府掌畏吾兒之居
漠地者阿朮卒於軍改雷廉封化高五州爲路徙峽州路

於江北舊治復置鄧縣隸鞏昌是歲置樵茶都轉運司於江州總江淮荆湖福廣之稅

十八年辛巳春正月丁未敕江南州郡官蒙古回回人兼用丙辰改符寶局爲典瑞監收天下諸司印二月乙亥發刑徒減死者爲軍征海外立上都留守司升敘州爲路隸安西省移潭州省治鄂州湖南宣慰司治潭州丙戌發肅州軍民穿渠溉田乙未皇后弘吉剌氏崩皇太子真金自獵所奔至三月己亥立登聞鼓院有冤者許搥鼓以聞是月許衡卒夏五月癸卯禁西北邊回回人越境爲商丙辰歲星犯右執法庚申分烏蒙路隸雲南順慶路隸川東詔括契丹戶嚴鬻人禁安西軍站凡和雇和買與民均役秋七月甲午朔置和中所於甘州以儲兵糧癸卯太陰犯房

距星庚戌松州知州僕散禿哥前後射虎萬計賜號萬虎將軍八月甲子朔招討使方文言擇守令崇祀典戢奸吏弭盜賊整軍旅獎忠義六事下廷臣議行丙寅熒惑犯諸侯西第三星壬辰海南諸國貢犀象閏月癸巳朔熒惑犯司怪南第二星庚戌太陰犯昴丁巳命播州每歲親貢方物壬戌兩淮轉運使阿剌瓦丁坐盜官鈔伏誅詔給怯薛台糧拘其所占田爲屯田九月癸酉定市舶商貨已經泉州抽分者他處止令輸稅甲申太陰犯軒轅大星冬十月乙未以皇后祔享太廟乙巳命安西王府協濟戶及南山隘口軍於延安鳳翔六盤等處屯田丁未置河西織毛段匠提舉司己酉命張易等參校道藏諸書惟畱道德經餘悉焚毀庚戌詔諭于不昔國來附壬子置各省蒙古提舉

學校官擢管軍千戶程文海爲集賢直學士兼祕書少監
和禮霍孫守司徒改諸路屯田孛蘭奚總管府爲農政院
十一月癸亥朔詔諭探馬禮令歸附甲子賊首陳弔眼伏
誅桂龍降流之邊地甲戌太陰犯五車次南星丁丑犯鬼
丁亥太陰掩心東星十二月甲午命貪吉刺帶爲右丞相
阿合馬爲左丞相丙午太陰犯軒轅大星癸丑免益都淄
萊寧海開河夫今年租賦仍給其傭直免福州路十八年
以前逋賦是歲揚州火通泰二州饑發粟二萬石振之
十九年壬午春正月壬戌朔諸王撒里蠻誘執叛王昔里
吉遣使馳報丁卯增兩浙鹽價每引鈔四貫命江南稅糧
依宋舊制折輸絲絹雜物二月辛卯朔饒州總管姚文龍
言江南財賦歲可辦鈔五十萬錠詔以文龍爲江西道宣

慰使兼措置茶法甲午給甘州逃軍五千人自願挈家還
戍者鈔萬有六百二十錠每口布一匹驢一頭乙巳立廣
東提刑按察司及鐵冶總管府改羅羅斯宣慰司隸雲南
浙東宣慰司治溫州分軍戍江南自歸州及江陰至三海
口凡二十八所癸丑大良平元帥蒲元圭遣子入朝三月
戊寅蓋都千戶王著擊殺阿合馬於闕門壬午捕著及其
黨高和尚并樞密副使張易皆醢於市夏四月丁酉貧吉
刺帶罷命和禮霍孫爲右丞相戊戌立回易庫倒換金銀
昏鈔帝以諸王公主分地所設達魯花赤例不遷調百姓
苦之敕滿任依常調選代壬寅敕於灤河造官車以給歲
用毋派取民甲辰帝悟阿合馬之姦逮其子忽辛赴揚州
鞠問始鉤攷諸處平準庫汰倉庫官覈所占民田還其主

戊申敕凡文書俟奏可始用御寶刊行蒙古畏吾字所譯通鑑庚戌設懷孟路河渠使副官壬子制民間貸錢息以三分爲率定內外官三年攷滿敘升未滿者不得超越命雲南諸路各建學祀宣聖五月己未朔戮阿合馬尸窮治其黨黜省部濫設官七百十四人罷南京西京宣慰司盡拘諸位下所給印己巳遣浙西宣慰同知劉宣等理算各省鹽茶及財賦府出納之數籍阿合馬妻子親屬奴婢財產并逮其黨耿仁別都魯丁至大都誅之癸未以麥朮丁爲中書右丞張雄飛參知政事乙酉令逃軍覈其面仍使從軍六月己丑朔日食癸丑罷司徒府及農政院丁巳亦奚不薛千戶宋添富順元總管阿里降秋七月戊午朔日食詔於揚州岳州各立行樞密院辛酉剖阿合馬黨郝禎

棺戮其尸壬戌禁諸位下差軍護送私營錢貨蒙古軍守江南者令更番還家壬申立馬湖路總管府戊寅議建阿失荅不速皇城用木十二萬道遠難致詔如察罕海子地築土爲牆乙酉閣婆國貢金佛塔九月丁巳朔定歲貢額上路總管府三年兩貢儒吏各一人下路總管府二年一貢儒吏遞進儒必通吏事吏必知經史中書省掾史有關於院臺令史內選取院臺令史於六部令史內選取六部令史以歲貢儒吏補充戊午誅阿合馬第三子阿散四子忻都剝其皮以徇并誅其從子宰奴丁庚申罷漣水海州屯田以游顯行省揚州領浙江漕運辛酉海外南番俱藍國主遣使奉表進寶貨及黑猿一那旺國主忙昂以其國無識字者遣使四人不奉表蘇木都刺國主土漢八的亦

遣使二人蘇木達國相臣那里八合刺攤赤以事在俱藍
聞詔代其主打古爾奉表進指環印花綺段及錦衾二十
合寓俱藍耶里可溫主兀咱爾撒里馬亦奉表進七寶項
牌藥物又管領木速蠻馬合麻亦遣使奉表同日起闕諸
唯俱藍最遠招討使楊廷璧三往招之乃入貢王戌敕官吏受賄及侵盜倉庫輕
者杖決重者死言官緘默與受賊人一體論罪乙丑括雲
南所產金置打金洞達魯花赤其稅賦用金爲則壬午釐
正選法置黑簿籍阿合馬黨人之名冬十月丁亥朔復以
耶律鑄爲左丞相札散平章政事丙申立詹事院置左右
詹事各一員設京畿江淮兩都漕運司歲僉江淮運糧至
中灤京畿接運至大都癸卯分禁中出納爲三庫御用寶
玉遠方珍異隸內藏金銀質孫衣段隸右藏常課衣段綺

羅縑布隸左藏以宦者掌其鑰乙巳遣使招降法里郎阿魯乾伯等國庚戌以四川民少止畱成都廣元順慶重慶夔府五路餘悉裁去詔兩廣福建雲南地遠五品以下官從行省銓注奏用乙卯誅阿合馬長子忽辛次子抹速忽於揚州十二月戊午置利用庫於上都甲子召宋衍聖公孔洙爲國子祭酒兼提舉浙東學校壬申設沿河巡軍有勢家爲商賈阻遏民船者沒其家甲戌釋天下重囚除大逆外令充征海軍丙子四川大盤洞主向臭友等來朝十二月庚寅以張文謙爲樞密副使乙未給瀛國公趙鼎衣糧發遣上都殺宋丞相文天祥於燕京癸卯詔御史臺得自選其屬仍參用蒙古人員罷湖廣金銀鐵冶提舉司隸各路總管府徵處士劉因爲右贊善尋辭歸是歲始命上

海總管羅璧暨千戶朱清張瑄造海船六十艘由海道運糧四萬六千石至大都

二十年癸未春正月己未立弘吉剌氏爲皇后

是爲南后必皇后

丑定匿名書告事重者死輕者流遠方諭管民官凡遇災傷過時不報及按察使不卽行視者加罪丁卯伐船材於烈燬都山乾山起運民夫八千人己巳太陰犯軒轅御女庚午徙平灤造船廠於陽河就近運木庚辰太陰入南斗壬午改鞏昌按察司爲河西隴北道廣東按察司爲海北廣東道廣西按察司爲廣西海北道福建按察司爲福建閩海道二月戊子定川廣戍軍三年一更仍廩其家屬立武成王廟於樞密院西以孫武子以下十人從祀庚寅太陰掩昴庚子省四川東西北三道宣慰司及潼川萬戶府

新軍總管府威灌茂等州安撫司是夜太白犯昴辛丑定
軍官選格萬戶千戶鎮撫自奏準日始三年爲滿通行遷
轉百戶以下不拘此例官吏賊罪自五十貫以上皆決杖
除名不敘百貫以上者死乙巳太陰犯心甲寅降太醫院
爲尙醫監立江南四省官醫提舉司三月丁巳罷河西行
御史臺立鞏昌等處行工部罷福建市舶總管府并泉州
行省入福建行省免福建歸附後未徵苗稅己未放五臺
山及南城造寺夫四萬人是夜歲星犯鍵閉庚申太陰犯
井壬戌犯鬼乙丑罷淮安淘金官惟計戶取金立雲南提
刑按察司給西川福建兩廣之任官驛己巳歲星犯房癸
酉掩房廣州民林桂方反僞號羅平國改元延康官軍禽
斬之壬午省福建道宣慰司復立行省於漳州夏四月丙

成立別失八里和州等處宣慰司己亥太陰犯房壬寅犯
南斗庚戌四川右丞耶速帶爾招撫筠連州定州諸蠻獨
山都掌蠻不降進討之禽其長得蘭紐遂班師辛亥麥朮
丁等檢覈萬億庫以罪繫者多請付蒙古人治帝曰蒙古
人爲利所汨亦異往日矣其擇可任者使之五月戊午縱
平灤造船軍歸耕撥大都軍代之丙寅太陰掩心東星丙
子諭雲南重囚先令便宐處決者自今恐濫及無辜仍令
待報戊寅從御史中丞崔彥言罷采民間室女頒行宋文
思院小口斛立海西遼東提刑按察司按治女真水達達
部己卯詔江南漕運於濟州新開神山河及海道兩路兼
運時上年海運方至直沽六月丙戌嚴私易金銀禁己丑增內外官
吏俸詔曰設官分職本以爲民邇年諸物增價俸祿不足

養廉以致侵漁百端公私交困自今內外官吏俸給以十分爲差添支五分以示體恤臣下至意辛亥四川行省討平九溪十八洞蠻析其地爲州縣隸順元路以向世雄爲義巴洞安撫大使秋七月癸丑朔免征骨鬼軍賦丙辰太白犯井癸亥太陰犯南斗乙丑太白犯井丙寅開雲南驛路分亦奚不薛地爲三立宣慰司及總管府丁卯熒惑犯司怪丙子省江南十道宣慰司官四十七員定上都商稅六十分取一立總教院及務農司八月癸未以明理察平章軍國重事立懷來淘金所丙午太白犯軒轅丁未歲星犯鉤鈴濟州新開河成立都漕運司九月壬子太白犯軒轅少女戊午太陰犯斗象山賊尤宗祖聚眾掠海上阿剌帶往招之降其徒萬人海道以寧丙寅徙舊城市肆局院

稅務入大都止四十分徵一己巳太白犯右執法辛未以歲登開諸路酒禁壬申太陰掩井癸酉熒惑犯鬼甲戌太陰犯鬼熒惑犯積尸氣太白犯左執法冬十月甲午以札散爲樞密副使詔五衛軍十人爲率以七人三人分爲二番每月放七人者還家正月復役正月放三人者還家四月復役更替休息丙申太陰犯昴庚子建寧降賊黃華復叛聚眾十萬號頭陀軍犯崇安浦城諸縣壬寅耶律鑄罷戊申立和林平準庫罷中興管課及北京鹽鐵提舉司十一月癸丑命各省印造授時曆初各省曆日皆取給京師以道遠不時至令制湖等四省所用者龍興印之雲南四川等省所用者京兆印之設大都城門尉戊寅太白歲星相犯十二月壬辰以中書參議溫迪罕圖魯花廉貧不附權勢賜鈔百錠辛丑徙新附官仕內地甲辰太陰掩

熒惑丙午罷雲南金箔規措所定質子令凡大官子弟遣赴京師是歲以新開河運船多損壞仍事海運改領北庭都護府爲大理寺給布萬匹振女眞饑民

二十一年甲申春正月乙卯帝御大明殿羣臣上尊號曰

憲天述道仁文義武大光孝皇帝朝賀如正旦儀大赦天

下甲子罷諸路理算官江浙平章忙忽帶進眞珠百斤丙

寅立安豐芍陂兩屯戶於淮南發軍士二千人耕之丁卯

建都金齒西南夷十二部皆降

先建都爲緬所制今緬破故降

立江淮荆

湖江西四川行樞密院治建康鄂州撫州成都丙子建寧

賊首黃華自殺丁丑諸路按察使陞辭帝曰卿等到官當

宣明朕意勿求貨財名成則利隨之徇利必失其名而身

命且不可保尙其慎之二月諭各路堤堰令總管府并州

縣長官常行驗視遇有損壞即便修築毋致淹沒民田聽各道按察使不時糾察貧民情願復業者給付原產仍免一切逋課私債三年後方許取索壬辰邕州民黃大成爲亂梧韶衡諸州民起應之甲午罷新開河役移其軍及水手各萬人事海運丁未徙江南樂工八百家於京師戊申移江淮行省治杭州浙西宣慰司治平江省黃州宣慰司入淮西道立法輪竿於大內萬壽山高百尺遷宋宗室及其大臣之家屬於內地三月丁巳皇子北平王南木合至自北邊丞相安童亦至丁卯太廟殿成奉安神主夏四月從御史李昂言有父兄居憲臺而子姪爲按察使或父兄爲按察使而子姪在別道爲官者竝令迴避軍官毋受民詞押運毋帶私貨管民官自三月停訟十月始行和買諸

物止從出產處所隨時給值不得強其所無重累百姓乙酉省泉府司入戶部立大都留守司及總管府置西川延安鳳翔興元宣課司己亥涿州巨馬河決籍江南鹽徒軍戊申命開元路造船百艘付狗國戍軍五月己酉立二千戶總欽察康里子弟願爲國宣勞者己未調江南田賦十之二其十八年以前逋欠盡免徵縱江南匠戶之無藝業者十九萬爲民庚午括天下私藏天文圖識太乙雷公式七曜麻推背圖顯明麻苗太監麻有私習及收匿者加罪閏月己卯改西南番安撫司爲總管府給西川蒙古軍鈔使耕沿江曠土四頃以下免輸稅丙戌遷揚州行臺於杭州罷羣牧皮貨局所六月壬子遣使分道尋訪測驗晷景日月交會麻法甲子遣軍六千人淘金雙城移和林屯田

軍於五條河秋七月丁丑朔立衍福司革軍官所帶相銜
八月丁未雲南華帖白水江鹽井三處土老蠻叛殺諸王
及行省使者定軍官格例以河西回回畏吾兒等依各官
品充萬戶府達魯花赤同蒙古人女真契丹同漢人若女
真契丹生西北不通漢語者同蒙古人女真生長漢地者
同漢人已酉遣無籍軍舊從征者還家勿許持弓矢放福
建畚軍竝收其軍器散其部長於近處爲管民官甲戌以
建都女子沙智立站有功令管萬戶事詔議貢舉九月甲
申京師地震立福建鹽課市舶都轉運司并江淮福建爲
一省癸巳太白犯南斗甲辰海南貢白虎師子孔雀丙午
發鈔常平倉與民和糴己酉敕管軍萬戶爲行省宣慰使
者毋兼管軍事仍爲萬戶者毋兼蒞民政辛酉敕宋有手

號軍死則以兄弟及子繼之免文其手十一月庚子太陰犯心辛丑和禮霍孫麥朮丁張雄飛溫迪罕皆罷復命安童爲右丞相盧世榮爲右丞史樞爲左丞撒的迷失廉希恕參知政事敕中書省整治鈔法定金銀價禁私自回易癸卯海外南巫里別里刺理倫大力等四國各奉表來貢命司農司自襄陽至東海募民開荒免其租六年并一切雜役十二月甲辰朔立常平鹽局癸亥從盧世榮言禁民間釀酒官自酤賣丙寅荆湖行省招降龍昌寧龍延萬等奉羊馬白氈來貢癸酉御史中丞崔彧言盧世榮不可居相職帝怒削彧官命翰林集賢院召諸路醫學教授增修本草是歲西僧楊璉眞伽發宋帝后諸陵及大臣冢墓凡百有一所宋太皇太后謝氏卒於燕征東招討使聶古帶

言海道艱阻罷征骨鬼兵

二十二年乙酉春正月戊寅弛民間買賣金銀及江淮魚利禁罷懷孟諸路竹監聽民賈易官止收稅庚辰毀宋郊天臺建佛寺戊子增遣軍士二千人屯田芍陂歲收米四萬餘石真定民劉驢兒有三乳自以爲異謀不軌伏誅移五條河屯軍於兀失蠻札失蠻之地癸巳盧世榮奏罷江南行御史臺以所屬按察司爲提刑轉運司俾兼錢穀隸內臺辛丑命禮部領會同館壬寅造大樽於殿以木爲質銀內金外鏤雲龍高一丈七寸二月詔攷課官吏從前責以五事因無激勸之方徒示虛文致鮮實效自今每歲終攷課以五事備具著有成效者加其父母妻子封蔭乙巳增濟州漕船三千艘役夫萬二千人

初江淮歲漕米百萬石於京師海運十萬

石膠萊六十萬石濟州三十萬石以水淺舟大多不改江
能達至是更以百石之舟每舟用四人故夫數增多改江
淮江西元帥招討司爲上中下三萬戶府宿州蘄縣真定
沂鄒益都高郵沿海七翼爲上萬戶棗陽十字路邳州鄧
州杭州懷州孟州眞州八翼爲中萬戶常州鎮江潁州廬
州亳州安慶江陰水軍益都新軍湖州淮安壽春揚州泰
州弩手保甲處州上都新軍黃州安豐松江鎮江水軍建
康二十二翼爲下萬戶蒙古漢人新附諸軍相參爲三十
七翼翼設達魯花赤萬戶副萬戶各一員隸所在行院丙
午割荆湖所隸八番羅甸歸西川析嵐管爲二州辛亥廣
東宣慰使月的迷失討平潮惠二州盜郭逢貴等四十五
寨降民萬餘戶丙辰罷膠萊所鑿新河壬戌太陰犯心升
御帶庫爲章佩監戊辰復立行御史臺於江州居江浙湖

南江西之中諸路按察司職掌仍舊從盧世榮請立規措
所回買江南民田拘收天下銅器增置真定濟南太原甘
肅江西江淮湖廣諸道宣慰司兼都轉運司嚴治課程復
命貧吉刺帶爲左丞相忽都魯平章政事罷融州總管府
爲州三月禁民間不得織造銷金段匹倡優市井諸婦不
得妄用金飾釵釧等物違者沒入官丙子遣太史監候往
占城測日晷癸未改甘州行省爲宣慰司隸寧夏行省庚
子詔依舊制每鹽一引四百斤價銀十兩折鈔爲二十貫
夏四月庚戌監察御史陳天祥劾盧世榮罪惡詔同赴上
都面質世榮悉款服癸亥以麥朮丁不附世榮命與安童
同治省事五月甲戌以郭佑參知政事戊寅詔甘州每地
一頃輸稅三石壬午發軍千人修阿失鹽場倉以忻都爲

賜里玉招討使戒毋興兵遠略甲申立汴梁宣慰司依安
西王故事汴梁以南命親王出鎮戊子改昇江烏定朵里
滅該等府爲路雲南省臣脫帖木爾陳調逋賦徵侵隱戍
要隘明黜陟罷轉運給親王賦豪戶除重稅決盜賊增驛
馬取質子定俸祿教農桑優學校卹死事捕逃亡十六事
下中書省議行庚寅復徙行臺於杭州行院於建康六月
庚午詔減商稅罷互行輟耕錄云身行本謂之互郎謂主互市者唐人書互作互故因譌耳
省市舶司入轉運司帝諭安童曰國家大事汝蒙古人未
知朕左右無復漢人可否皆自朕決汝當盡心善治百姓
無使重困致亂以貽朕羞秋七月壬申造溫石浴室及更
衣殿甲戌敕祕書監修地理志戊寅分甘州新附軍屯田
亦集乃路甲申析闕里吉思所平大小十谿洞爲郡縣丁

亥廣東宣慰使月的迷失入覲言山寨降者五百餘所帝問戰而後降邪招之卽降邪對曰是皆招降者也因言兵荒後未嘗存恤其民州縣官復無之任者以故盜賊各據一方互相攻殺人民漸耗宜令良吏急往撫之帝可其奏八月庚子給鈔萬二千四百錠爲本取息贍甘肅屯軍辛丑命有司祭斗三日己未復立泉府司九月立竹課提舉司於衛州凡係官竹園以時采賣設府州司縣弓手祇候公使人等免其差稅令眾戶計額均輸戊辰罷榷酤聽民自造民間仍用銅器乙亥以江北諸課程聽杭鄂二省節制道途迂遠改直隸中書省丙戌速木都刺馬答二國遣使入貢西崖門渠長阿者等百餘戶來降冬十月己亥發鈔五千錠和糴於應昌復分河間山東鹽課轉運司爲二

丙辰遣兵戍合刺章

卽烏蠻

其部長之子令入質京師千百

戶子畱質雲南王所復置四川嘉定路及敘州宣撫司烏
蒙土官阿蒙叛討禽之并其妻子伏誅十一月己巳朔給
宋鹽軍千餘人衣糧使屯田自贍乙未盧世榮伏誅丙申
赦囚徒黥其面及宋時私販軍竝從征海外十二月丁未
皇太子眞金薨諡曰明孝太子己未丹太廟楹辛酉分立
集賢院掌提調學校徵求隱逸召集賢良凡國子監道教
陰陽祭祀占卜等事皆隸之甲子敕工匠官毋遷轉是歲
命哈刺合孫爲太宗正復改大理寺爲大都護府始行振
糶法於京城設三鋪發倉粟減其直糶之歲以爲常以大
都供應繁苦悉免軍民地稅

二十三年丙戌春正月戊辰朔以皇太子故罷朝賀禁齋

金銀銅錢越海互市壬午太陰犯軒轅太民癸未罷鞏昌
二十四城拘權所歸有司癸巳升龍興武寧縣爲寧州福
州長溪縣爲福寧州降鎮巢府爲巢州敘州爲縣丙申設
諸路推官審理刑獄上路二員中路一員二月己亥禁用
私斛斗稱尺乙巳罷山北遼東道宣慰司立東京等處行
中書省治咸平丙午太陰犯井丁未定按察司副使以下
每歲二月巡行分治十月還司癸丑復置隰州大寧縣戊
午并江南行樞密院四處入行省罷鬻江南學田癸亥太
史院上郭守敬所撰授時厯經及李謙厯議命宣付翰林
國史院丙寅召曲阜教授陳儼京兆蕭剡蜀人虞應龍修
地里志儼剡不至三月己巳遣直學士程文海偕行臺官
博采江南人才備臺察用太陰犯婁甲戌省雲和署入教

坊司立欽察衛親軍都指揮司乙亥命麥朮丁仍中書右丞與郭佑竝領錢穀楊居寬典銓選丙子定行臺以八月巡行郡縣至次年四月還癸巳歲星犯壘壁陣夏四月庚子置燕南河東山東各道宣慰司濟南太原爲諸王分地令各委官一人同治敕江南諸路財賦竝隸中書省甲辰徙杭州行臺治建康統淮東西湖南北浙東西江東西八道按察司庚戌始制謚法己未以從官南方者秩滿多不歸遣使盡徙北還初有旨凡爲盜者殺無釋省臣疑太過帝曰朕以漢人徇私用金泰和律斷事致盜賊滋眾故有是言人命至重今後非詳讞者勿輒殺五月己巳熒惑犯太微西垣上將徙江東按察司治宣州庚辰歲星犯壘壁陣乙酉熒惑犯太微右執法六月丙申朔太白犯御女乙

已復立大司農司詔以所定農桑輯要書頒諸路戊申括馬凡色目人有馬者三取其二民馬悉入官辛酉封楊邦憲妻田氏永安郡夫人領播州安撫司事秋七月己巳立營田總管府覈江南官田之爲強豪所據者復尙醢監隸光祿寺置中尙監庚午徙江淮行省於揚州立洪澤南北三屯於淮南路之白水塘黃家壩壬午總制院使桑葛具省臣姓名上奏丞相貪吉刺帶平章阿必失合忽都魯一時皆罷癸巳定省院臺部官屬中書省除中書令外左右丞相二員平章政事二員左右丞各一員參知政事二員行中書省除罷置丞相外平章政事二員左右丞各一員參知政事僉行省事竝二員樞密院除樞密使外同知院事一員樞密院副使僉樞密院事竝二員院判一員御史

臺御史大夫一員中丞侍御史治書侍御史竝二員行臺
同內臺六部尙書侍郎郎中員外郎各二員其餘竝聽省
臣酌汰詔諭中外曰惟我祖宗肇造區夏雖中書已嘗建
立而官制未暇舉行迨朕圖大以宅中思欲繼志而述事
集儒臣之公議法前代之鴻章爰立省部院臺以正朝廷
綱紀自疆土極照臨之遠致省臺有內外之分日益月增
官冗人濫常敕有司澄汰意必舊制遵承比聞近侍之言
謂益幾時之敝彼不勝重任有壅上聞苟尙蹈匪彝時惟
予咎其清冗職用復前規八月己亥罷淮東宣慰司以黃
蘄壽昌隸湖廣行省安慶六安光州隸淮西宣慰司乙卯
太白犯軒轅右角罷德平定昌二路置德昌軍民總管府
九月乙丑朔海外諸番曰馬八兒曰須門那曰僧急里曰

南無力曰馬蘭丹曰那旺曰丁呵兒曰來來曰急蘭亦解
曰蘇木都刺凡十國各遣子弟來朝甲申太陰犯天門冬
十月甲午朔太白犯右執法徙浙西按察司治杭州戊戌
太陰犯建星壬寅太白犯左執法辛亥太陰犯東井河決
開封祥符十五處調民夫二十餘萬分築隄防甲寅太白
犯進賢壬戌徙甘州戍軍屯田亦里黑之地馬法國進鞍
勒氈甲十一月乙丑以張瑄朱清竝爲海道運糧萬戶免
徵覆舟糧戊辰太白犯亢己卯太陰犯井辛巳歲星犯壘
壁陣禁禽獸孕時畋獵十二月戊戌太白犯東咸丙午罷
大有署丁未太陰犯井丁巳犯氐戊午詔諸路分置六道
勸農司宣慰司在內地者設官四員江南者六員是歲大
司農上諸路學校凡二萬一百六十六所植桑棗雜樹二

千三百九萬四千六百餘株蘇湖饑振米二十萬石

二十四年丁亥春正月乙丑俱藍國遣使來朝甲戌太陰犯東井乙酉犯房丁亥復改江浙省爲江淮行省辛卯立上林署二月庚子太陰犯天關辛丑犯東井以麥朮丁平章政事范文虎爲中書右丞商議樞密院事戊午敕諸王闔里鐵木爾節制諸軍乃顏遣使徵東道兵諭闔里鐵木爾毋輒發閏月癸亥太陰犯辰星定春秋二仲上丙日祀平陽堯帝祠乙丑復分立尙書省以總制院使桑葛及鐵木爾竝平章政事阿魯渾薩理爲右丞葉李爲左丞馬紹忻都竝參知政事惟行省事與中書共議餘聽尙書省從便奏請辛未定國子監祭酒一員司業二員擇素有德望者居之建國子學設博士二員助教四員生員百二十人

蒙古漢人各半仍建集賢院設各省儒學提舉二員統諸路府州縣學甲申太陰犯牽牛乙酉改淄萊路爲般陽路罷江南竹木柴薪魚牙諸稅復改各省爲行尙書省六部爲尙書六部庚寅法司以諸路罪囚過多請遣官分道行刑帝曰囚非羣羊豈可遽殺邪宐悉配隸淘金三月甲午更造至元寶鈔詔曰鈔法之行二十餘載官吏奉法不虔以至物重鈔輕公私俱詘比者廷臣奏請謂法敝必更其造至元寶鈔頒天下中統鈔通行如故以至元寶鈔一貫文當中統交鈔五貫文子母相權官民通用務在新者無冗舊者無廢凡歲賜周乏餉軍皆以中統鈔爲準丙申太陰犯東井乙卯遼東饑弛太子河漁禁丙辰降重慶路定遠州爲縣命都水監開汶泗水達京師汴河溫役夫修故

堤夏四月癸酉太陰犯氐甲戌犯房諸王乃顏反五月己亥移濟南宣慰司治益都燕南按察司治大名南京按察司治南陽太原按察司治西京壬寅戶工兩部各增尙書二員帝自將征乃顏發上都括江南僧道馬以軍行免北京今歲絲銀經過郡邑各振鈔六月庚申朔百官獻馬給衛士壬戌帝至撒兒都魯之地乃顏黨金家奴塔不台率所部逼行在而陣遣前軍敗之壬申帝駐蹕千大利幹魯脫之地獲乃顏輜重千餘秋七月癸巳乃顏敗走追執之其黨悉平丁酉弘州匠官以犬兔毛製如西錦者以獻授匠官知弘州戊戌太陰犯南斗辛丑犯牽牛壬寅熒惑犯輿鬼庚戌雲南金齒渠長打奔等兄弟內附壬子太陰犯司怪癸丑日暈連環白虹貫之罷乃顏分地益都平濩所

元史卷六

本紀

三

署官移北京道按察司治豪州以河西瓜沙等州立闕鄜
屯田八月癸亥太白犯亢乙丑車駕還上都置江南四省
交鈔提舉司己巳謫從叛諸王軍前自効浚亦集乃路河
渠丙子填星犯壘壁陣己卯太陰犯天關辛巳犯東井甲
申太白犯房丁亥立豐贍昌國濟民三署女人國貢海人
九月丁酉熒惑犯長垣庚子太白犯天江乙巳太陰犯畢
戊申咸平懿州北京以乃顏叛民廢耕作告饑振糧五萬
石辛亥熒惑犯太微西垣上將壬子太白犯南斗冬十月
戊午朔日食壬戌太陰犯牽牛大星丙子桑葛撿覈中書
錢穀矯殺參知政事郭佑楊居寬乙酉羅北甸土官火者
阿禾及維摩合刺孫之子竝內附是夜熒惑犯左執法十
一月壬辰太白犯壘壁陣月暈金土二星命桑葛爲尙書

右丞相兼總制院使領功德使司事阿魯渾薩理平章政事葉李轉右丞馬紹爲左丞丙申熒惑犯太微東垣上相戊戌調新附軍屯田合迷玉速曲之地庚子太白晝見辛丑改衛尉院爲太僕寺隸宣徽院丙辰熒惑犯進賢十二月定告病官限期三年以下者敘用五年以下者降一等七年以下者降二等七年以上者不敘癸亥立尙乘寺金竹寨主搔盧等以所部百二十五寨內附丙寅太白晝見太陰犯畢丁卯減揚州歲額米十五萬石以鹽引五十萬易民糧免浙西魚課發河西甘肅富民往闔鄜與漢軍雜居屯植癸酉諸王薛徹都所駐之地雨土七晝夜羊屬盡死以鈔幣綿布雜給之是歲始立行泉府司專掌海運增萬戶府爲四遂罷東平河運

二十五年戊子春正月庚寅祭日於司天臺辛卯毀中統鈔板戊戌弛遼陽漁獵禁勿捕天鵝殺鹿羔癸卯海都犯邊命諸王朮伯統兵北征乙巳太陰犯角戊申犯房辛亥省器盒局入諸路金玉工匠總管府癸丑設江南行大司農司及淮東西兩道勸農營田使舉察勤惰歲具有司勸課實蹟爲殿取二月壬戌省遼東海西道按察司入北京江南湖北道按察司入荆南改南京爲汴梁路北京爲武平路西京爲大同路東京爲遼陽路中興爲寧夏府路以江西茶運司兼榷酒醋稅徵葛洪山隱士劉彥深赴京己卯以江南站戶貧富不均命有司料簡合戶稅至七十石置備驛馬一匹並免雜徭獨戶稅逾七十石願入站者聽合戶稅不得過十石獨戶稅無上百石其使臣供應官爲

支給毋累站戶辛巳以杭州西湖爲放生池命皇孫雲南
王耶先鐵木爾帥兵鎮大理三月丁亥熒惑犯太微東垣
上相戊子太陰犯畢庚寅改闌遺所爲監己亥太陰掩角
壬寅命會同館倣古職貢制繪爲圖俟番使至詢其風俗
土產去國里程籍錄以進夏四月戊午太陰犯井庚申用
桑葛言鉤攷應昌和羅所其扈從諸臣種地多者依軍站
例除四頃外計畝征租癸亥渾河決發軍築堤戊辰浚怯
烈河以溉口溫淖爾黃土山民田廣東賊董賢舉等七人
皆稱大老聚眾剽掠吉贛南韶雄汀諸郡甲戌萬安寺成
佛像窗壁皆用金爲飾增建直沽海運倉甲申命皇孫鐵
穆耳行邊討乃顏餘黨削平遼左諸部置東路萬戶府五
月戊子諸王察合子闊闊帶叛樞密副使土圖哈執之以

來丙申兀馬爾來獻璞玉己亥遣官分道鈎攷中統鈔本
升雲南北勝施州爲北勝府戊申太白犯畢孟州烏河川
雨雹大如拳癸丑遷四川省治重慶宣慰司治成都河決
汴梁太康通許皆被害六月辛酉定各御史任滿驗所言
事大小多寡爲升降甲戌太白犯井改西南番總管府爲
永寧路丁丑太陰犯歲星發兵千五百人詣漠北浚井秋
七月甲申朔復葺興靈二州倉轉米備振壬辰改會同館
爲四寶庫儲待所爲提舉司己亥熒惑犯氐庚子太白犯
鬼乙巳太陰掩畢保定路野蠶蠶絲可爲帛八月丙辰熒
惑犯房己未太白犯軒轅大星癸酉以河間鹽運司兼管
順德廣平碁陽三鐵冶庚辰分萬億庫爲寶源賦源綺源
廣源四庫九月癸未朔熒惑犯天江乙未罷檀州淘金戶

諸王篤哇犯邊庚子太陰犯畢鬼國建都皆遣使來貢營
五庫於禁中以貯幣帛癸卯熒惑犯南斗南臺御史中丞
劉宣自殺庚戌集賢院新編本草成冬十月庚申從桑葛
請置徵理司遣省院臺官十二人理算江淮江西福建四
川甘肅安西六省錢穀給兵以衛其行甲子置虎賁司尋
改武衛司丙寅置湖廣溪洞蠻獠四總管府統州縣洞百
六十所用漢人爲達魯花赤雜土人治之丙子敕造鐵羅
圈甲及長甲給北征軍遣瀛國公趙鼎學佛於吐蕃己卯
免儒戶雜徭學田所入羨餘收貯集賢院以給多才藝者
十一月丁亥以何榮祖參知政事禁有分地之家私役富
民爲柴米戶及賦外雜徭己亥立桑葛輔政碑甲辰改總
制院爲宣政院掌釋教遇吐蕃有事則分院往鎮十二月

丁巳海都兵犯邊拔都耶孫脫迎擊死之辛酉太陰犯畢
甲子犯井甲戌犯亢熒惑犯壘壁陣丙子耶速不花以昔
烈門叛甘肅行省約諸王八八拜荅罕駙馬昌言合兵討
之皆自縛請罪獨昔烈門西走追執之歸於京師是歲置
醴源倉罷安和署以光祿寺直隸都省升滄州軍營城爲
滄溟縣大司農上墾地三千五百七十頃積義糧三十一
萬五千餘石

二十六年己丑春正月丙戌京師地震發兵塞沙陀間鐵
烈兒河辛卯行泉府使沙不丁上市舶司歲輸珠四百斤
金三千四百兩帝命貯之以待貧者辛丑立武衛親軍都
指揮使司掌修治城隍及京師內外工役分侍衛軍萬人
隸之是夜太陰犯氏癸卯罷膠萊海道運糧萬戶府循州

賊鍾明亮寇贛南掠寧都據秀嶺與廣東董賢舉台州楊鎮龍柳世英相應戊申徙廣州按察司治韶州以荆南按察司所統遼遠割三路入淮西二路入江西從壽張尹韓仲暉言開河以通運道起須城縣安山西南由壽張西北至東昌又西北至臨清引汶水達御河二月辛亥朔置延禧崇福二司徙江淮行省治杭州改浙西道宣慰司爲淮東道治揚州自泉州至杭州立海站十五專運番夷貢物及商販奇貨丁卯命右丞相伯顏知樞密院事鎮和林統有漠北諸路置知院自此始諸王哈丹寇開元己巳立左右翼屯田萬戶府統軍二千於霸州河間耕田甲戌命鞏昌總帥汪惟和將部軍萬人北征三月庚辰朔日食詔亡宋係官田土歸附以來被權豪影占及指熟作荒詭名避

役者許自首官從前應收子粒概行免徵仍令佃種立雲

南屯田以供軍儲甲午太陰犯亢乙未新鑄渾天儀成以

黃金爲飾癸卯金齒人塞完以其民二十餘萬戶來歸夏

四月戊午禁民挾弓矢犯者籍爲兵省江淮屯田打捕提

舉司七惟存徐邳海州揚州兩淮淮安高郵昭信安豐鎮

巢斬黃魚網石湫十二所庚午沙河決發民築堤障之甲

戌置浙東江東江西湖廣福建木棉提舉司責民歲輸木

棉十萬匹福建參政魏天祐執宋江東制置使謝枋得至

燕不屈死大方通鑑載枋得致天祐書云大元制世民物

十三歲之母一新宋室通臣只欠一死其所以不死者以九

大元仁慈如天不妄殺一忠臣義士其所以寧爲民不爲

官者忠臣不事二君此天地間常道也今蒙大元五次以

禮招徠上有堯舜下有巢由上有湯武下有隨光其所以

效虞人之死而不往學夷齊之死而不仕者正欲使天下

後世知大元之量能使謝某不失臣節視死如歸也今蒙

參政拘管道院日勞吏卒監守其憂慮亦大勞矣且問參
政容一謝某聽其爲大元開民於大元何損殺一謝某成
其爲大宋忠臣於大元何益特恐前誤大宋後誤大元諸
公自無面目立於天地耳某母喪未葬只當衰經入君門
倘大元有命惟有瀝寫江南官吏貪酷生靈愁苦之狀作
萬言書獻之一聽進退并求速死以愧世之爲臣不忠者
天祐讓之曰封疆之臣當死封疆安仁之敗何不死於得
曰程嬰公孫杵臼二人皆忠於趙一存孤一死節一死於
十五年之前一死於十五年之後皆不失爲忠臣蓋棺定
論參政豈足以知此枋得北行在途惟茹蔬果積數月困
甚至燕甫四月庚辰發武衛親軍溶河西務漕渠及口
日卒於驛館五月庚辰發武衛親軍溶河西務漕渠及口
溫淖爾河壬辰太白犯鬼發大同宣德民築倉於昴兀刺
之地丙申以季陽諡都淄萊三萬戶軍久戍廣東疫死者
眾令二年一更賊首鍾明亮率眾降令赴闕江淮省臣逗
畱不遣丁酉復徙行御史臺於揚州浙西按察司於蘇州
以忻都爲尙書省左丞張天祐爲中書省參知政事己亥
設回回國子學罷永盈庫以上供幣帛入太府監辛丑御

河湓入會通渠漂東昌民廬改莊浪路隸安西省省流江
縣入渠州青山苗蠻三十三寨內附六月戊申朔詔雲南
地遠六品以下官許本省選辟復置雲南按察司西番進
黑豹庚申諸王乃蠻帶敗哈丹兵於托吾爾河丙寅海都
犯邊和林宣慰使怯伯起兵應之乃顏餘黨金家奴竝入
寇甲戌西南夷中下爛土洞四百一十寨四川山齊蠻民
四寨相繼來降立江淮財賦總管府掌所籍宋太后貲產
隸中宮秋七月戊寅朔帝親征海都辛巳安山渠成長百
五十里建牖三十賜名會通河戊子太白經天辛卯太白
犯牛發和林所屯乞爾乞思等軍北征賦百官家製戰襖
乙未太陰犯歲星癸卯沙河湓鐵鐙杆堤決八月辛未歲
星晝見癸酉升四川金竹寨爲府徙浙東道按察司治婺

州河東山西道按察司治太原宣慰司治大同九月戊寅
歲星犯井丙戌罷濟州泗汶漕運司乙未太陰犯畢丙申
熒惑犯太微西垣上將冬十月癸丑太陰犯牛宿距星甲
寅熒惑犯右執法乙卯改八番羅甸隸湖廣丙辰禁內外
官受人饋酒食違者籍其家貲之半閏月戊寅車駕還大
都庚辰敕商販有中統料鈔者聽易至元鈔行用丙戌西
南夷生番心拶等八族內附鍾明亮復反韶雄諸賊響應
江淮省合兵討之獲賊首董賢舉巨應祥歸京師丁亥辰
星犯房己丑太陰犯畢熒惑犯進賢丙申婺州賊葉萬五
寇武義縣庚子取石泗濱作磬以補宮縣之樂辛丑羅斛
女人二國遣使來貢十一月丙午朔漳州賊陳機察巨大
老張順等以其黨降命赴闕丁巳改播州爲播南路升平

恩鎮爲巨縣戊辰太陰犯亢十二月辛巳括天下馬一二品官許乘馬五三品三四五品二六品以下皆一餘悉拘入官乙酉太白犯南斗命司天臺祭熒惑丁亥封皇子闊闊出爲寧遠王甲午以汪惟能爲征西元帥將所部軍入漠北其先成漠兵毋令還翼詔天下梵寺所貯藏經集僧看誦仍給所費歲爲例駕幸大聖壽萬安寺置旃檀佛像是歲紹興安西甘州大水兩淮雨雹大都路霖雨害稼東平蝗各蠲租減糶如例伯顏遣使告邊民饑詔賜網罟取魚自給

二十七年庚寅春正月庚戌太白犯牛癸丑太陰犯井敕從臣子弟入國子學乙卯造祀天帳殿丙寅改儲待司爲軍儲所復立興文署掌經籍版及江南學田丁卯熒惑犯

房己巳改西南番總管府爲永寧路降臨淮府爲盱眙縣

二月乙亥朔立全羅道萬戶府戊寅太陰犯畢辛巳括河

間昔寶赤戶口

輟耕錄云昔寶赤應房之執役者每歲以所養海青獲頭鵝者賞黃金一錠頭鵝天

鵝也以首得之又重過三十斤且以進御膳故曰頭癸未泉州地震丙戌改奉先縣

爲房山己丑賊首鍾明亮復降詔械致闕下庚寅太陰犯

亢辛卯發虎賁更休士赴上都修城乙未改雲南蒙憐蒙

萊二甸俱爲路羅羅斯貢雨甌三月壬子熒惑犯鉤鈴己

未放福建獵戶沙魚皮戶爲民發雲州民夫鑿銀洞庚申

罷行司農司及各道勸農營田司增按察司僉事二員總

勸農事徙四川省仍治成都立江南營田提舉司掌僧寺

貲產置金竹府大隘等四十二砦蠻夷長官甲子楊震龍

餘眾掠浙東討賊者多俘良民敕行臺揀放夏四月癸酉

朔發六衛漢軍萬人伐木修城丙子太陰犯井壬辰熒惑
守氏十餘日遣使詣馬八兒國訪求方伎士五月戊申鍾
明亮復叛寇贛州戊午罷江西行院移省治吉州罷奉宸
庫復立安和署乙丑太陰犯填星乙巳立雲南行御史臺
及銀場官庚午括天下陰陽戶口仍立各路教官有精於
藝者歲貢各一人六月壬申朔升閏鹽州爲柏興府降普
樂州爲閏鹽縣金州爲金縣河湓太康沒民田三十二萬
餘畝免其租甲戌桑州總管黃布達那州長羅光寨安郡
州長閉光過率蠻民萬餘戶內附丙子繕寫金字藏經成
凡糜金三千二百餘兩己丑熒惑犯房丁酉定宗寶錄成
秋七月丙午禁平地忙安倉釀酒犯者死癸丑江淮平章
沙不丁言倉庫官侵盜公帑請依宋法黥而斷其腕帝曰

此回回法也不允戊午貴州苗蠻作亂劫順元路免大都
歲賦絲及酒醋課辛酉熒惑犯天江丙寅雲南闔力白衣
甸渠長內附八月辛未朔日食并廣東道眞陽浚光二縣
爲英德州丁亥復徙川南道宣慰司於重慶癸巳地大震
武平地陷黑沙水涌出壓溺死者七千二百餘人壞民居
無算遣平章鐵木爾往視九月癸卯歲星犯鬼乙巳禁諸
王遣僧建寺擾民諸王閭里鐵木爾與合丹戰於瓦法大
破之丁未御河決高唐沒民田命有司塞之戊申鐵木爾
至武平以便宣調租賦罷商稅弛酒禁斬爲盜者轉海運
米萬石振之金竹知府搔盧招降竹古弄古魯花等三十
餘寨詔立縣設長官總把參用土人丁卯命江淮行省鉤
攷行教坊司所總江南樂工租賦

和羅西京糧其價每
十兩以上增一兩

冬

十月壬申封皇孫甘麻刺爲梁王出鎮雲南丁丑江陰寧國大水民流移者四十五萬戶尙書省入告帝曰此亦何待上聞當速振之凡出粟五十八萬三千餘石辛巳太白犯斗乙酉梁洞梁宮朝吳曲洞吳湯暖等二十族內附己丑新作太廟登歌宮縣樂罷昔寶赤歲取鷓鴣於成都十一月戊申太陰掩填星詔浙東盜賊竊發復立三萬戶一戍沿海一戍溫處一戍紹興婺州其揚州建康鎮江三城雄跨大江置七萬戶杭州庫藏所在置四萬戶并瀕海要害處各增戰船分兵演習水戰庚戌罷雲南會川路采碧甸子辛酉太陰掩左執法壬戌太宗實錄成癸亥河決祥符義唐灣陳穎二州皆被患甲子徙河北河南道按察司治許州乙丑易水溢漂沒雄莫任丘新安田廬命有司築

堤障之丁卯降南雄州爲保昌縣韶州爲曲江縣十二月
戊寅免大都平灤保定河間歷年逋租十三萬五百餘石
辛卯太陰犯亢乙未摘蒙古軍萬人戍雙城及婆婆府以
防合丹兵己亥降溧陽路爲縣湖廣省上宣課珠九萬五
百一十五兩青田賊劉甲乙集眾萬人寇溫州是歲河北
十七郡蝗江西霖雨瀕河水溢各調振如例發粟六萬二
千石振通州河西務流民

二十八年辛卯春正月壬寅太白熒惑填星聚於奎癸卯
傭民運米十萬石致上都糶振丁巳遣貴由赤四百人北
征辛酉罷江淮漕運司專事海運升安慶府爲路降無爲
和州二路及六安軍爲州巢州及懷遠軍爲縣免江淮積
逋糧三百一十萬六千餘石鈔千一百五十錠絲絲六千

八百餘斤壬戌桑葛以罪罷二月辛未徙萬億庫金銀入禁中富寧庫癸酉改福建行省爲宣慰司隸江西詔行臺勿聽行省節度丙子罷徵理司丁丑命完澤爲尙書右丞相不忽木平章政事己卯立雲南金齒曲靖二宣慰司管軍萬戶府辛巳以桑葛沮抑臺綱數箠御史命省臺官論定其罪帝曰桑葛爲惡始終四年臺臣豈不知之知而不言當得何罪侍御史杜思敬曰奪官追俸惟上所裁遂罷臺臣之久任者癸未太陰犯左執法甲申太白犯昴乙酉立江淮湖廣江西四川行樞密院江淮治建康湖廣治鄂州江西治贛州四川治成都丙戌敕改提刑按察司爲肅政廉訪司每道仍設官八員副使以下各分臨所部不得苛細生事暗於大體違者罰同不職以何榮祖爲尙書

右丞賀勝參知政事丁亥建周廬於宮城南分居宿衛土
癸巳踏桑葛輔政碑籍其家三月己亥朔加嶽瀆四海封
號丁未太陰犯御女己酉犯右執法庚戌犯太微東垣上
相乙卯太白犯五車辛酉建紫壇殿壬戌南丹州莫國麟
入覲授安撫使禁江淮富家賄充府縣卒史隱庇差賦累
及貧民夏四月甲戌以地震故免武平今歲徭役乙未歲
星犯輿鬼上都饑斗米銀四兩禁宰牝羊弛杭州西湖禽
魚禁五月戊戌以廉希恕爲湖廣右丞陳仲達不顏于思
王信竝同知海北海南道事將兵征黎蠻立左右兩江宣
慰司都元帥府壬寅太陰犯少民辛亥罷大都燒鈔庫及
江南歲輸木棉下桑葛於獄誅其妻黨湖廣平章要東木
燕南宣慰司八吉由癸丑罷尙書省政事悉由中書甲寅

太陰犯牛丁巳建白塔二各高丈二尺以居呪師朵四的
性吉等七人右丞何榮祖進所撰至元新格帝命鈐版頒
行己未以門荅占復爲御史大夫行御史臺事六月丁卯
朔立黃平元帥府改隸播州乙酉洗國王洞主市備什王
弟同來朝辛卯太陰犯畢拘汴梁逃人男女配偶成家給
農具耕種禁蒙古人往回回地爲商秋七月丙申朔置建
都金冶令旁近民鍊金輸官己亥太白犯井戌申罷江南
諸省買銀提舉司招集亡宋涅手軍得八萬三千人立萬
戶千百戶領之丁巳桑葛伏誅其弟鞏昌宣慰使荅麻刺
荅思懼罪自殺募民耕江南曠土戶不過五頃官授之券
爲永業己未降江陰路爲州宜興府爲縣分華亭之上海
爲縣壬戌弛畿內秋耕禁八月乙丑朔平陽地震壞民舍

萬有八百二十六區丙寅太白犯輿鬼己巳罷江西行泉
府司大都甲匠總管府廣州人匠提舉司丙子太陰犯牽
牛癸未歲星犯軒轅大星戊子太白犯軒轅大星及歲星
遣使詣雲南捕黑虎咀喃番邦進金書寶塔及黑師子癸
巳太陰掩熒惑命工部造飛車九月辛丑立行宣政院治
杭州庚戌太白犯右執法丙辰熒惑犯左執法戊午太白
犯熒惑辛酉歲星犯少民命尙衣局織無縫衣詔路府州
縣除達魯花赤外長官並選用漢人佐貳官色目漢人參
用冬十月乙丑朔羅斛國王上金表貢黃金象齒丹頂鶴
五色鸚鵡翠毛犀角篤繹龍腦等物癸未罷各省行樞密
院入行省丙戌太陰犯軒轅大星并御女丁亥改洞蠻爛
土立定雲府升陳蒙洞及合江俱爲州中書省臣言蠻洞

請歲進馬五十及雨氈佩刀丹沙雌雄黃諸物率二歲一
上帝曰從其所爲勿加過督己丑太陰犯太微東垣上相
癸巳免衛輝種仙茅戶徭役十一月甲辰太白犯房丙午
熒惑犯亢丁未太陰犯畢甲寅犯歲星乙卯新添葛蠻洞
官阿汾青貴來貢立葛蠻軍民安撫司戊午金齒國遣阿
腮入覲庚申熒惑犯氐辛酉徵太子贊善劉因不起增置
望雲銀冶十二月乙丑籍探馬赤六萬戶成丁者爲兵宋
全太后瀛國公母子已爲僧尼有地三百六十頃詔免其
租壬申立河南江北行省治汴梁甲戌罷諸路鈎攷錢穀
取歷年逋負文牘置一室非上命而竊視者加罪庚辰太
陰犯御女改江淮行省爲江浙行省治杭州癸未太陰犯
太微東垣上相八番洞官吳金叔等以部民二萬有奇內

附己丑熒惑犯房庚寅犯鉤鈴改營田提舉司爲規運提
點所辛卯詔釋天下囚非殺人者戶部上天下戶數內都
一百九十九萬九千四百四十四江淮四川一千一百四
十三萬八百七十八游食者四十二萬九千一百一十八
宣政院上天下寺宇四萬二千三百一十八區僧尼二十
一萬三千一百四十八人詔頒農桑雜令

二十九年壬辰春正月甲午朔日食左右有珥上有抱氣
免朝賀己亥復置都水監以郭守敬兼領監事遣官分視
黃河堤堰庚子改八番羅甸爲普定府隸雲南罷福建銀
鐵提舉司禁商賈私以金銀航海甲辰詔江南學田歲入
聽其自掌春秋釋奠外以廩師生及士之無告者貢士莊
田仍令核數入官丙午罷河南宣慰司以汴梁襄陽河南

南陽歸德隸河南省復割湖廣之德安漢陽信陽隸荆湖北道蘄黃隸淮西道并淮東道三宣慰司咸隸河南省其荆湖北道舊領辰沅澧靖歸常德者直隸湖廣省戊申太陰犯歲星及軒轅左角己酉罷四寶庫仍置會同館立織造段匹提舉司改陳蒙爛土軍民安撫司隸八番都元帥以土人爲使二月甲子朔金竹蠻長貢馬氈各二十七詔減所部貢馬賜新附黑蠻衣襖遣回命進所產丹沙雄黃之精者己巳除問刑官鞭背法太陰犯畢庚午桑州生苗羅甸國古州等洞蠻籍所部民十一萬九千三百餘戶來獻乙亥立總管高麗女真漢軍萬戶府己丑歲星犯軒轅大星遣諸王之從逆者於各邊俾從軍自効三月丁未治桑葛黨納速刺丁滅里忻都王巨濟皆伏誅己酉以鐵哥

平章政事阿里爲右丞梁德珪參知政事併亦奚不薛及
八番羅甸二宣慰司都元帥府爲一仍令亦奚不薛隸湖
廣羅甸還隸雲南夏四月丙子太陰犯氐己卯弛甘肅太
原酒禁仍椎酤辛卯設雲南諸路學校其教官以蜀士充
之五月丁未詔雪楊居寬郭佑冤給還家產改思州安撫
司爲軍民宣撫司隸湖廣罷東平路河道提舉司入都水
監六月戊辰詔聽僧食鹽不輸課壬申鐵旗城後察昔折
乙烈率部曲三千餘戶來附甲戌置司籍庫以儲物之籍
入者壬午以瓊州新附洞寨置會同定安二縣己丑太白
犯歲星閏月辛卯朔罷福建歲造象齒鑾帶戊申熒惑犯
狗國辛亥廣西上思州土官黃勝許陷忠州遣程鵬飛將
兵擊之勝許敗走入交趾甲寅右江岑從毅降以其子斗

榮襲鎮安路總管廣南副使賽甫丁以風聞三十餘事訐告省官帝惡其傷政體捕惡黨下吏如法秋七月庚申朔遣使撿覈竄名鷹房受糧者辛未太陰犯牛庚辰定雲南福建兩廣州縣官聽省臺銓選具姓名上聞給授宣敕八月丁酉辰星犯右執法己亥太白犯房乙巳歲星犯右執法丙午用郭守敬言浚通州至大都漕河役軍匠二萬人又鑿六渠灌昌平諸水戊午福建參政魏天祐私發民夫鍊銀坐贓逮治敕廉訪司在燕南者還治真定河南者還治汴梁九月丁卯茆難十國安化光蘭州洞蠻內附卽光蘭州地立定遠府設官如例癸酉廢新得州置通江縣復漢州綿竹縣徙瓜沙二州民於甘肅畫地使耕寧夏半藝紅花詔令盡種穀麥辛巳太白犯南斗罷雲南行臺徙置

西川設雲南廉訪司丁亥置烏思藏納里速古魯孫等三路宣慰司冬十月戊子朔召福建廉訪知事張師道赴闕授翰林直學士庚寅浚浙西河道導水入海癸巳詔歲終各行省詣闕奏事令行臺同赴面奏一歲舉刺之數丙申四川洞蠻向思聰等來朝信合納帖音國遣使入覲廣東進暹國所上金冊乙巳太陰犯井丁未犯鬼癸丑罷懷孟竹課乙卯太陰犯氐諸王明里附海都叛詔伯顏討之率眾來降十一月詔父子嗣續人倫大本同宗繼紹氣脈感通非我族類神不歆享凡有撫養諸弟從孫爲子及螟蛉他姓者並行禁治老人年八十以上者準免一子徭役俾得侍養壬戌太陰犯壘壁陣己卯犯太微東垣上相癸未命關津讖察姦宄丙戌提省溪錦州銅人諸洞渠長楊秀

朝木忽魯甸土官阿魯等入覲十二月庚寅改封皇孫梁王甘麻刺爲晉王鎮北邊立金齒木來府癸巳罷福建及寧國路銀治庚子太陰犯井甲寅犯太微西垣上將敕都水監修治保定沙唐河堤堰是歲眞定河間益都各屬州縣蟲食桑盡無蠶兩浙饑免民租一百二十五萬七千餘三十年癸巳春正月壬戌遣使招諭漆頭金齒蠻丙寅太陰犯畢詔汰冗員省內外官府二百五十五所計六百六十九員丁卯罷雲南延慶司遙授洛波卜兒二蠻酋爲知州捏怯烈女眞數百人以漁自給帝曰與其勤於水曷若力於田其給牛具令屯耕以食庚午驗洞蠻酋楊總國等來朝甲戌升蔡州爲散府分和林漢軍屯田杭海罷諸路魚鹽局丙子西番一甸蠻酋三人來覲各授蠻夷軍民官

丁丑太陰犯氐庚辰歲星犯左執法丞相安童卒新置社稷壇成高五丈方廣如之社東稷西社用白石爲主飾以五方色土稷不用主四周皆黃土壇南各植松一株北墉瘞坎墼垣悉倣古制別爲齋廡門廡三十三楹二月己丑減江浙海運米四十萬石免大都公賦壬辰太陰犯畢丙申卻江淮福建所進鴈鶩仍禁軍官無從禽擾民丁酉回回獻荅納珠邀價數萬帝曰珠何爲哉當畱是錢以贖貧者發海運米十萬石給遼陽戍兵乙巳熒惑犯天街丁未以新附洞蠻吳動鰲爲潭溪軍民官庚戌太陰犯牛辛亥發總帥汪惟和所部軍征吐蕃陝西四川兵征西番復立雲南行御史臺敕江南豪右庇匿盜賊爲首者誅餘徙之內地癸丑太白犯壘壁陣三月庚申以札散知樞密院事

甲子海都入寇括天下馬十萬匹己巳立行大司農司辛未太陰犯氐夏四月己亥定上海澈浦慶元廣東泉州市舶司物貨皆三十取一并温州舶司入慶元杭州舶司入稅務癸丑太白犯填星甲寅授光州光龍等十二人邦崖王文顯等二十八人金竹府馬麟等十六人大龍番禿盧忽等五十四人永順路彭世彊等九十人安化州吳再榮等十三人師壁散毛洞句荅什王等四人各爲蠻夷官賜璽書遣歸毀江南諸道觀聖祖天尊祠五月丙辰朔定雲洞蠻來附丙寅浙西大水令富民募人疏決水道辛未定僧寺邸舍並收商稅丁丑散上都工匠三千戶俾就食大都六月丙戌選河西質子軍赴皇孫阿難荅所出征己丑歲星犯左執法庚寅以雲南旦當仍屬西番宣慰司改准

西斡黃等路隸河南江北行省丙申太陰犯斗乙巳以皇
太子寶授皇孫鐵穆耳總兵北邊召丞相伯顏還己酉潛
太湖秋七月己未免福建歲輸皮貨及泉州織作紵絲甲
子太陰犯建星壬申命月赤察爾知樞密院事丁丑新開
通州漕河成賜名通惠河以只爾合忽所汰乞爾吉思戶
屯出合思合之地辛巳太陰犯鬼八月丙戌括所在荒田
令放良漏籍等戶屯種甲午辰星犯太微西垣上將甲辰
太陰犯畢丁未立鎮守黎蠻海北海南屯田萬戶府戊申
太陰犯鬼凡月癸丑朔立海北海南博易提舉司稅如市
舶例丁卯太陰犯畢出御史臺贓罰鈔五萬錠給衛士之
貧者冬十月癸未朔皇太子祔於太廟戊子修汴梁堤己
丑遣兵部侍郎忽魯圖花等使閤藍可兒納答信合納帖

首三國仍賜信合納帖音渠長三珠虎符庚寅彗星入紫微垣抵斗魁光芒尺許凡一月乃滅丙申熒惑犯亢己亥太陰犯天關辛丑犯井甲辰詔赦天下庚戌造象躡掌甲辛亥禁江南州郡乞養良家子轉相販鬻及強將平民略賣者十一月壬子朔立海北海南道肅政廉訪司治雷州庚申以金齒木朵甸戶口增立下路總管府給其長雙珠虎符乙丑太陰犯畢丁卯犯井庚午犯鬼丙子熒惑犯鉤鈴戊寅歲星犯亢免江南都作院軍匠出征己卯召河南行省平章巴顏入中書省平章政事十二月壬辰以張九思爲左丞乙未太陰犯井是歲天下路一百六十九府四十三州三百九十八縣千一百六十五宣撫司十五安撫司一管軍民官七十三長官司五十一眞定深州靜安大

水登州大興蝗易州大雨雹如雞卵各調振有差

三十一年甲午春正月壬子朔帝不豫免朝賀知樞密院伯顏至自軍中庚午帝大漸癸酉崩於紫檀殿在位三十五年壽八十乙亥葬起輦谷夏五月戊午上尊諡曰聖德神功文武皇帝廟號世祖蒙古語曰薛禪皇帝

論曰元之初入中國震蕩飄突惟以殺伐攻虜爲事不知法度紀綱爲何物其去突厥回紇者無幾及世祖興始延攬姚樞寶默劉秉忠許衡之徒以漢法治中夏變夷爲華立綱陳紀遂乃并吞東南中外一統加以享國長久垂統創業軼遼金而媲漢唐赫矣哉且其天性寬宏包帡無外阿里不哥及海都篤哇諸王皆親犯乘輿對壘血戰力屈勢窮一朝歸命則皆以太祖子孫大朝會於上都恩禮宴

賚如初當南北鋒焰血戰之餘或離間以侍郎張天悅通宋而不信敕南儒被掠賣爲奴者官贖爲民所獲宋商宋諜私入境者皆縱遣之而不誅置椎場於樊城通宋互市弛沿邊軍器之禁其長駕遠馭如是宋幼主母子至通州命大宴十日小宴十日然後赴上都除弘吉剌皇后厚待之事別詳皇后傳外其母子在江南莊田聽爲世業其後文宗時市故全太后田爲大承天寺永業市故瀛國公田爲大翔龍寺永業直至順帝末始奪和尚趙完普之田歸官直與元相終始宋之宗室如福王與芮等隨宋主來歸授平原郡公其家貲在江南者取至京賜之此外宗室多類此卽奸民冒稱趙氏作亂者從不以累及宋後其優禮亡國也如是思創業艱難移漠北和林青草叢植殿隅俾

後世無忘草地又畱所御裘帶於大安閣以示子孫武宗至大中嘗詣閣中發故篋閱之則皆大練之服西域賈胡屨獻牙忽大珠價值數萬而不受宮闈肅穆無豔寵奇聞至元八年平滌路昌黎縣民生男夜中有光或奏請除之帝曰何幸天生一好人柰何反生妒忌命有司加恩養伯顏伐宋諄諄命以曹彬取江南不戮一人爲法其儉慈也又如是非命世天縱而何惟功利之習不能自勝於中故日本瓜哇之師遠覆於海島王阿桑盧陪克之臣相仍於覆轍蓋質有餘而學不足歟

元史卷六終